

皇宋十朝綱要

卷第二十二

眉山李壘編

高宗

壬子紹興二年

金主吳乞買天會十年

正月甲午復置賢良方正科 庚子叛將白常圍岷州辛丑
關師古率兵至床川寨與戰破之常解去 壬寅上移蹕臨
安府 韓世忠舉兵由鳳凰山大破范汝爲復建州殺賊衆
萬餘人汝爲逃入回源洞自焚死 曹成釋向子謹于藍山
縣 丙午上至臨安府

二月癸酉詔自今僧行童行依舊法試經放度 甲戌詔吏
部尙書李光爲江東招撫使以神武軍都統制王玘副之
丁丑詔分統制崔增李捧邵清趙延壽李振單德忠所統兵
爲六將以御前忠銳爲名尋又以水軍統制徐文所統兵爲
忠銳第七將 詔淮甸營田租課每畝更減放一斗仍自承
佃後免納二年 辛巳向子謹奏已撫定曹成一軍成駐兵

道州江南岸丁亥引兵趨行在發道州 是月金人陷慶陽府執楊可昇降之

三月壬辰朔湖北賊翟進擁戰船五十餘艘奄至漢陽軍大肆劫略殺知軍事趙令弼等官吏百餘人 江西安撫大使李回遣人部送李敦仁等三十九人至行在詔分隸諸將

苗傅餘黨韓世清聚兵久屯宣州跋扈意叵測李光至宣州與王玘汰世清一軍尤弱四千人執世清赴行在尋誅之

先是南平王李乾德卒追封南越王子陽煥嗣戊戌進封陽煥爲交趾郡王 罷發運司 庚子罷隨軍轉運使 辛丑

金僞都統阿巴金吾犯隴州隴安縣將趨成州秦鳳路總管吳璘等擊走之 丙午復置中書門下省檢正官一員省樞

密院檢詳官一員 壬子劉豫與金人合攻翟興癸丑賊兵徑犯中軍興挺身戰軍敗死之 辛酉知郢州霍明誘殺鄧

隨郢州鎮撫使桑仲 是月劉豫自東平府遷東京

四月壬戌朔呂頤浩都督江淮兩浙京湖諸路軍事 僞齊遣兵攻光州石額寨總領張昂遣將蔡延祚引兵迎戰敗之

殺其將何秀 曹成復叛縱兵焚略乙丑陷賀州知州劉全
先遁去 戊寅僞齊統領王資率所部兵二千餘人自虹縣
過淮來歸 己卯上諭呂頤浩專治軍旅秦檜專理庶事
乙酉太平州兵陸德等執知州張錞據城叛殺知縣鍾大方
等李光遣統制耿進等水陸進兵往招捕之尋詔大使司攝
錞鞫治其本州官吏軍民等並放罪 丁亥詔岳飛率兵掩
擊曹成保護二廣

閏四月丙申岳飛自堯嶺率兵發賀州逢曹成賊兵三萬餘
人飛奮擊大敗之追至賀州城東成趨桂嶺遁走 丁酉高
麗國王遣使崔惟清沈起等奉表進貢 辛丑岳飛引兵連
破曹成奪北藏嶺上梧關兩隘 乙巳飛進攻蓬嶺大破賊
衆丙午復桂嶺縣奪賊大寨成收餘兵遁入連州飛又遣統
制張憲追破之遂復連州成奔江西 丙午詔諸路帥臣不
許招納淮北人 丁未詔李光親往節制耿進張俊王進等
諸軍擒捕陸德進等入太平州擒斬次首領周青等撫定軍
民擒德檻送行在所誅之 戊申選人七階分左右

五月癸亥詔呂頤浩出師令百官於城外班送 庚午以武
德郎趙琦所統兵爲御前忠銳第八將 詔溫台明州守臣
速措置挖扼海道又令紹興府臨安平江秀州置斥候專探
報海道事宜 庚辰臨安府火 乙酉置修政局 丙戌手
詔內外侍從臺省寺監職事官監司守令等各述所職及已
見的確利害以聞 置沿海制置使 丁亥以左朝奉大夫
仇愈爲之 戊子詔毀銷金屏風 是月詔李光營繕建康
行宮

六月庚寅朔李宏引兵入潭州城擒馬友殺之 辛卯秦檜
提舉修政局 孟庾等遣人招安曹成成聽命率衆至彬州
自歸甲午詔遷成官令孟庾韓世忠刻日班師 霍明旣殺
桑仲仲將知鄧州李橫舉兵爲仲報仇圍郢州破之明敗走
收餘衆保漢川縣壬寅橫圍德安府 癸卯詔川陝合赴省
試人令宣撫司於置司處差官類試 甲寅召呂頤浩赴行
在 詔兩浙江淮諸州縣守令多方存拊東北流寓之人如
無屋舍居止即許於寺院或空閑官舍內安泊 戊午詔諸

路出賣官田

七月甲子廢泉州市舶司 丙子馬友將郝通率兵五萬至
筠州李回檄岳飛往招撫之通等聽命飛悉汰其老弱留精
兵一萬八千餘人並隸飛軍 辛巳韓世忠大破劉忠於平
江縣長樂渡忠遁去其徒斬忠持其首來降 壬午以知紹
興府朱勝非爲同都督江淮荆襄諸軍事 甲申增創沿海
制置使一員於浙東路 乙酉罷武臣試換文資 孔彥舟
率衆叛北歸劉豫惟統制陳彥明不從獨引其所部兵來歸
八月壬辰朱勝非力辭前命詔以孟庾權同都督諸軍事
李橫攻德安城知府陳規固守凡六十五日不下橫解圍去
庚子金酋粘罕喻通問使王倫欲通和好遣令歸報癸卯
僞齊宿州遣官護送至境上詔令劉光世差官引接 戊申
止諸路出賣官田 甲寅秦檜罷爲觀文殿學士提舉江州
太平觀 是夜彗星出胃 乙卯詔罷修建康府行宮
九月戊午朔王倫還至行在入見 己未萊州統制忠義軍
馬范溫與僞齊海州兵戰於東海縣破之斬獲甚衆 辛酉

以彗星出大赦詔內外臣民直言得失 壬戌遣左迪功郎

潘致堯奉使金國爲奉表使武經郎高公繪副之 乙丑詔

朱勝非拜右僕射同平章事兼知樞密院事 甲戌彗沒

戊寅詔罷鎮江府織御服花羅 詔范溫率所部舟師來駐

秀州青龍鎮 庚辰詔諸路帥臣帶宣撫使者並罷 壬午

遣左司員外郎曾統等六人分使諸路 丙戌以顯謨閣學

士知興元府王似爲川陝宣撫副使與張浚同主管職事

十月富順民李勃詐稱徐王辨驗非是下大理鞠治庚寅獄

具伏誅 己未詔饒州置孳生馬監 丙申以大理卿張公

濟爲江浙荆湖閩廣九路都轉運使置司湖州 甲辰通判

楚州劉晏結五部統領兵劫奉使禮物叛入虜地知州柴春

戰死 鍾相旣誅其餘黨楊么等猶擁衆數萬據洞庭湖累

歲爲寇己酉詔知鄂州劉洪道知鼎州程昌禹速發兵招捕

之

十一月癸未臨安府火 是月熙河經略安撫使關師古敗

僞齊兵於抹邦山 京西路僞提點刑獄牛臯知汝州彭汜

來歸

十二月荊南民婦人阿易詐稱帝姬辨驗非是下大理鞠治
丁亥獄具伏誅 己丑福建路統制申世景破處州賊范忠
臨陣斬忠及其弟范義 知廬州王亨閉城門拒王師詔遣
統制巨師古率兵討之師古引兵入城擒亨置軍中辛卯詔
孟庾部送亨赴行在所 甲午臨安府火 己亥金虜寇熙
秦關師古擊敗之殺獲甚衆 甲辰詔知夔州盧法原爲川
陝宣撫副使與王似同治事召張浚赴樞庭同劉子羽馮康
國赴行在 庚戌諜報劉豫之子麟與金酋撒離喝合兵由
長安趨金商犯梁洋圍熙河蘭廓經略使關師古舉兵入熙
鞏破涇秦熙河三路賊兵并攻金人定西寨破之 李橫舉
兵北伐大破金人於揚石店斬獲甚衆復汝州并襄邾葉等
縣及西京欒川縣 詔建康府江南北岸令孟庾韓世忠役
屯駐將兵爲屯田 丙辰湖寇楊么黃誠聚衆至十萬周倫
楊欽夏誠劉衡等分據芷江各有大小舟數百艘程昌寓率
兵駐德山江北岸遣將杜湛與賊戰連破之 趙開始更西

蜀鹽法

癸丑紹興三年

金主吳乞買天會十一年

正月己未河南鎮撫使翟琮遣都總管董元帥兵復商虢陝州與知虢州董震都鈐轄董貴趙通等合攻僞留守孟邦雄擒邦雄父子斬獲甚衆追奔至白馬寺復西京庚申李橫據兵至陽翟縣僞知縣順軍闌和出降金酋撒離喝與劉麟合兵犯商州上津縣壬戌犯金州洵陽縣李橫兵至長葛縣石固村與金齊之衆戰大破之癸亥復潁昌府斬其將孫銓僞知府趙弼歿於陣詔遣戶部侍郎姚彥明往建康府專總領都督府錢糧戊辰金人陷金州癸酉始祀大火於商邱以闕伯配

二月朔劉忠雖破其次首領彭友復聚衆犯吉州龍泉縣己丑詔李回與岳飛共議選留精兵三千人討定之金人分兵犯饒風嶺及蟬溪分水嶺辛卯吳玠率諸將王俊郭仲王喜等拒戰數十合皆克司空山賊李通引兵寇無爲軍至廬江縣爲其麾下所殺其次首領劉德復擁衆還圍舒州詔

都督府發兵赴救 癸丑頒營田措畫十五條於淮南諸路
又詔諸路安撫使鎮撫使並兼營田使 乙未金人再攻饒
風嶺吳玠又擊却之 丁酉金人破饒風關統制郭仲戰敗
己亥陷興元府吳玠退屯仙人原劉子羽自西縣退保潭毒
山虜尋至金牛鎮知不可進從褒邪谷遁去 詔宗子伯琮
賜名瑗爲貴州防禦使 孟邦雄弟權河南尹邦傑率兵由
間道犯西京伊陽縣翟琮遣統制李吉宋德率兵掩襲敗之
丁未又敗之於漫流店翟琮遣將董貴攻金齊之兵於伊陽
壽安縣敗之 庚戌李橫承制以和州防禦使牛臯爲蔡唐
州信陽軍鎮撫使仍知蔡州彭圯知汝州臯將佐武功郎閣
門宣贊朱全知達州唐州刺史趙起知信陽軍 甲寅詔李
橫見進兵應援牛臯彭圯許便宜行事 乙卯詔岳飛選精
兵親至虔州討虔賊陳穎等
三月壬申詔諸路副總管依舊改充路分鈐轄副鈐轄改充
路分都監 知藤州侯彭老獻賣鹽寬贖錢一萬丁丑詔却
之仍鑄彭老一秩罷之 壬午關師古率兵出熙州與僞將

趙斯遇力戰敗之 癸未詔賊吏依祖宗舊制斷訖令刑部
鑄版行下

四月丁亥朱勝非以母喪去位 詔京東西淮南陝西陷沒

郡縣降敕書三十道付董震撫諭 庚寅詔湖南安撫使折

彥質節制鼎州荆南府兵速招捕楊么 壬辰都督府移治

鎮江 癸巳詔祖宗舊制賊吏杖脊於朝堂義當審度物價

益其俸而後行之 甲午併東西作坊入軍器所 丁酉詔

慈獻烈皇后改諡曰昭慈聖獻 庚子詔戶部增選人小使

臣俸 始祀日月五帝 詔罷引接高麗人使 辛丑潭鄂

荆南鼎澧諸軍合兵討楊么以糧道不繼皆相繼引歸 丙

午岳飛遣統領張憲破吉州賊彭友李滿兵殺獲其衆生擒

友及滿 戊申以浙西鈐轄史康民所領兵爲御前忠銳第

九將 庚戌知洋州王俊破金人於石門關追至漢陰縣而

還 辛亥禁駙馬宗室南班官內侍戚里出謁 水軍統制

徐文叛夜引舟自定海縣由東下沙口洋遁入山東界歸劉

豫 甲寅金人復駐兵攻和尚原吳玠遣統制楊從儀等率

兵援其弟璘力戰大破之

五月辛酉行在建睦親宅

壬戌潘致堯高公繪自金國回

入見

丁卯遣簽書樞密院事韓肖胄奉使金國爲通問使

工部尙書胡松年副之

壬申知建昌軍朱芾率兵破石坡

賊餘黨黃琮生擒琮斬之

乙亥詔已遣使詣金國議和出

榜約束沿邊守臣及統制官毋得專輒發兵侵犯齊國

庚

辰李橫等出兵失利引還襄陽金人復陷潁昌府

六月庚寅曲赦川陝

癸巳置樞密院檢詳文字官兩員

甲午以神武前軍都統制王撓爲荊南潭鼎豐鄂岳等州制

置使率全軍並統崔增舟師討捕楊么

戊戌罷沿海制置

使丁未始詔行在國子監量養士置博士二員

庚戌呂

頤浩提舉修國史

以前知承州王林所統兵爲御前忠銳

第十將

壬子知秦州吳璘始招致階文諸小部族令以馬

來市西馬復通蓋始此

七月己未復置博學宏詞科

始劉豫求救於金人金人遣

兵援之敗牛臯於毛駝岡豫將李成吳琦合攻盧氏伊陽縣

董先率衆南奔 丁卯編定太祖太宗眞宗仁宗英宗神宗
六朝勲臣詔諸路有勲臣之家不能自存許子孫經所屬自
陳當議量才錄用 癸酉朱勝非起復 甲戌詔以范溫統
兵隸神武中軍以溫爲本軍統領 己卯罷都督府隨軍轉
運判官

八月辛卯知河南府翟琮棄本鎮率衆奔襄陽乙未詔釋其
罪 甲辰以兩陽不時蘇州湖州地震詔羣臣言事 庚戌

三省樞密院朝殿進呈訖下得留身違者許御史臺彈奏
九月戊午呂頤浩罷爲鎮南節度使開府儀同三司提舉臨
安府洞霄宮 己未詔賊吏犯計正每正增作三貫 癸亥

岳飛入見

詔起居郎舍人直前奏事依元豐舊制施行

癸亥

壬申詔三省事非機速者仍命給舍書讀如無繳駁令畫特
書讀行下 乙亥劉光世韓世忠並爲宣撫使光世江東淮

西路世忠鎮江建康淮東路王玘岳飛並爲制置使玘
荆南岳鄂潭鼎澧黃州漢陽軍飛江西路舒蘄州玘利州路
丙子僞齊知亳州王彥充引船一千餘隻屯西渦駐兵壽

春府六安軍欲犯淮南詔劉光世選精兵五千乘機掩擊是月僞知光州許約會僞齊兵犯淮西陷固始縣

十月甲午許大理國市馬却其進奉

詔竊盜計贓定罪增

作三貫徒一年 庚戌詔宗正少卿太常司農寺軍器將作監各復置丞一員太府大理寺各增丞一員 王玘進兵至

岳州與楊么戰不利辛亥還鄂州

十一月甲子金元帥府遣安州團練使李永壽職方郎中王翊等隨韓肖胄偕來 乙丑詔三館祕閣閤門客省四方館

皇城司並隸臺察

丙寅諜報僞齊遣李成會北軍犯襄鄧

州將至德安府蘄黃州過江

樞密院上備禦事十一條頒

下諸將

庚午李成與金人合兵犯荆襄李橫棄襄陽退屯

應城漢川於是襄陽唐鄧郢隨信陽六郡相繼皆沒

臨安

府火

壬申詔皇城司依祖宗舊法不隸臺察 乙亥復行

元祐十科取士法

十二月癸未廢江池州鑄錢兩監

臨安府火

南丹州莫

公晟寇邊圍觀州癸巳詔廣西經略司速平之

乙巳詔北

使賀正旦免百官俱入 是月諜報金酋兀朮舉兵駐寶雞
渭河南會諸路兵積糧鳳翔府將寇蜀

甲寅紹興四年

金主吳乞買殂寶嗣位天會十二年

正月乙卯詔刑部侍郎章誼奉使金國爲通問使給事中孫
近副之 己未知鼎州程昌寓遣將杜湛與制置司統制王
渥等攻楊么破皮真寨俘賊黨八十餘人 壬戌詔張浚速
赴行在 己巳金人犯宕昌臨江寨並花石峽關師古遣統
領劉戢分兵禦之 癸酉浚運河 丙子龍圖閣學士耿延
禧上建炎中興記 金酋兀朮久駐鳳翔戊寅舉兵攻神岔
寨開道直犯大散關

二月乙酉湖北賊檀成據慈利縣犯長陽縣荆南鎮撫使解
潛遣統制使胡勉率兵擊破之於麓石溪襄賊田政引衆犯
歸峽西破馬金山寨己丑解潛遣統制王恪拒之於段岡大
破之悉擒政等 丙戌詔舉賢良 辛卯關師古遣將王琥
攻金人標狼寨克之又破之於長脚坡 己亥金人攻秋防
平山寨制置使吳玠遣將擊却之 辛丑金酋兀朮犯仙人

關吳玠與其弟璘拒守連敗之壬寅玠遣統制田晟擊之於梁家壩連敗之庚戌又命統制姚仲楊政力戰又敗之虜遁去 壬辰張浚入見 三月壬子吳玠遣同統制王俊追敗金人於河池癸丑又遣統領張彥追敗之於橫川店 癸亥關師古遣將至大潭縣襲擊叛將慕洧師古率兵繼至焚賊城壁樓櫓甚衆 乙丑張浚爲資政殿大學士提舉臨安府洞霄宮丁卯落職辛未詔居住福州 丙子王似升川陝宣撫使盧法原副之

四月庚辰吳玠爲川陝宣撫副使專一措置沿邊戰守免簽書本司公事 癸未前川陝宣撫司參議劉子羽責授散官

安置白州

丙戌詔閣門四方館客省依祖宗舊制並屬中

書省不隸臺察

庚寅臨安府置孳生牧馬監 甲午罷廣

西路提舉茶鹽司

關師古□熙州慕洧與金人合兵攻之

師古戰不勝脫身降虜

丁未忠銳統制崔增吳全隨王玠

討楊么戰於鼎江師敗皆歿

五月癸丑詔史官重修神宗哲宗兩朝正史實錄 甲寅詔

淮南安撫使兼營田使知州通判知縣縣令銜內並帶管營田事 乙卯岳飛舉兵破金齊之衆復郢州生擒僞知州王松丙寅復襄陽府丁卯復隨州生擒僞知州荊超劉豫收李成潰兵復增兵駐新野飛又出兵破之 金僞帥周貴舉兵復攻金州鎮撫使王彥遣統制許青等禦之戊辰戰於漢陰敗之 壬申詔三省六房細務專責六部長貳裁決 乙亥王彥復與金人戰於洵陽縣連敗之

六月癸未詔樞密院細務專責六部長貳裁決 丙戌三省言密院邊防兵機事體稍大三省密院共議奏陳同批旨書押奉行密院官押檢並筭子詔今三省官通書檢 壬辰詔川陝合赴省試人令宣撫司於置司州軍置試院差監試考試官四川類試院始於此 甲午權上造逍遙輦

七月庚戌建昌軍士修達劉順等擁兵叛殺知軍劉滂通判張械江西制置使胡世將遣參謀官侯慤中軍統制邱贊右軍統領趙祥會兵討之 詔命官告身易紙札以綾品卑者各納所直 癸丑楊么乘大水出兵攻破鼎州社木寨將官